



Resolución do 2 de febreiro de 2017, da Dirección Xeral de Educación, Formación Profesional e Innovación Educativa, pola que se convoca o Premio Proxecta de Innovación Educativa 2017 para os centros docentes públicos admitidos no Plan Proxecta durante o curso escolar 2016/17

O Plan Proxecta, como actividade de innovación educativa que chega a unha parte importante dos centros docentes de Galicia, ten dentro dos seus obxectivos a posta en valor daquelas experiencias que promovan unha mellora na calidade do proceso educativo a través de metodoloxías que poñan o foco na aprendizaxe competencial. Así mesmo, a propia resolución do Plan Proxecta recoñece a utilidade de valorar os traballos desenvolvidos polos centros para que sirvan de modelo a outros.

A Lei orgánica 2/2006, do 3 de maio, de educación, no seu artigo 90, dispón que as comunidades autónomas poderán recoñecer e premiar o labor didáctico ou de investigación de profesores e centros, facilitando a difusión entre os distintos centros escolares dos traballos ou experiencias que mereceron ese recoñecemento pola súa calidade e esforzo.

A Orde ECD/65/2015, do 21 de xaneiro, pola que se describen as relacións entre as competencias, os contidos e os criterios de avaliación da educación primaria, da educación secundaria obrigatoria e do bacharelato, dispón, no artigo 6, as estratexias metodolóxicas para traballar as competencias na aula, ofrecendo orientacións para facilitar o desenvolvemento desas estratexias no anexo II. Entre estas orientacións, destaca a metodoloxía por proxectos como unha das máis importantes.

A Resolución do 6 de setembro de 2016, da Dirección Xeral de Educación, Formación Profesional e Innovación Educativa, pola que se regula o Plan Proxecta e se establecen as bases para a participación dos centros docentes sostidos con fondos públicos dependentes desta consellería durante o curso escolar 2016/17, dispón os centros docentes admitidos que levarán a cabo os proxectos durante ese curso.

De acordo co anteriormente exposto,

DISPÓÑO

Artigo 1. *Obxecto e ámbito de aplicación*

Esta resolución ten por obxecto establecer as bases de participación e convocar o Premio Proxecta de Innovación Educativa 2017 para os centros docentes públicos



admitidos na convocatoria da Resolución do 6 de setembro de 2016, da Dirección Xeral Educación, Formación Profesional e Innovación Educativa, pola que se regula o Plan Proxecta e se establecen as bases para a participación dos centros docentes sostidos con fondos públicos dependentes desta consellería durante o curso escolar 2016/17.

Artigo 2. *Categorías de participación*

Establécense dúas categorías de participación, en función do tipo de centro:

- **Categoría A:** escolas de educación infantil, colexios rurais agrupados, centros de educación especial, colexios de educación infantil e primaria, colexios de educación primaria.
- **Categoría B:** centros públicos integrados, institutos de educación secundaria, centros integrados de formación profesional e centros públicos de educación e promoción de adultos.

Artigo 3. *Número de premios e dotación económica*

Concederanse, para cada categoría, catro premios: un primeiro, un segundo e dous terceiros, polos importes que figuran na táboa seguinte:

Categorías	Premio	Importe
A	1º premio	6.000 €
	2º premio	4.000 €
	3º premio	2.000 €
	3º premio	2.000 €
B	1º premio	6.000 €
	2º premio	4.000 €
	3º premio	2.000 €
	3º premio	2.000 €
	TOTAL	28.000 €

A comisión de selección poderá conceder accésits a aqueles centros que presenten unha boa práctica educativa digna de mención.

Os premios regulados nesta convocatoria serán atendidos con cargo á aplicación orzamentaria 10.50.423A.640.1 da Consellería de Cultura, Educación e Ordenación Universitaria, dos orzamentos de 2017, por un importe total de 28.000€.



Os premios poderán ser declarados desertos no caso de que non se atope a calidade suficiente para outorgalos. Con carácter excepcional, e por acordo motivado, a comisión de selección poderá determinar a redistribución da contía de premios declarados desertos entre o resto de centros premiados.

Este premio é compatible coa concesión de calquera outro de que sexa beneficiario o centro.

Artigo 4. Prazo para a presentación das solicitudes e documentación

O prazo de presentación de solicitudes será dun mes contado a partir do día seguinte ao da publicación desta resolución na web da Consellería (<http://www.edu.xunta.gal/portal/>).

Artigo 5. Presentación da solicitude e documentación

Cada centro docente poderá presentar unha soa solicitude de participación nestes premios.

Para participar nesta convocatoria será necesaria a presentación da seguinte documentación:

1. Solicitude dirixida ao director xeral de Educación, Formación Profesional e Innovación Educativa asinada pola persoa responsable da dirección do centro, segundo o modelo do Anexo desta convocatoria.
2. Certificación na que figuren os datos (nome apelidos e DNI) dos docentes que se presentan ao premio (como máximo serán 3 docentes). Entre estes docentes designarase unha persoa coordinadora, que se responsabilizará da documentación e o reparto de tarefas respecto á organización da información que se incorpora á memoria que se presente.
3. Esta certificación estará asinada pola persoa responsable da dirección do centro, que acreditará que os docentes que figuran no documento prestan servizo no centro durante o curso 2016/17 e que participaron activamente na realización da memoria.
4. Certificación de que o centro conta con autorización para o uso das imaxes dos menores participantes no traballo, se as houber. Este documento tamén o asinará a persoa responsable da dirección do centro.
5. Memoria descritiva da integración da metodoloxía por proxectos a través da participación do centro no Plan Proxecta en calquera das súas convocatorias, segundo as seguintes indicacións:

Estará elaborada polo equipo de docentes (máximo 3) que se presenten a este premio. Debe axustarse á descrición concreta e contextualizada do traballo realizado, facendo



fincapé na integración do traballo por competencias (aprendizaxe competencial) e na metodoloxía do traballo por proxectos.

Deberá estar redactada en lingua galega, ocupará un máximo aproximado de 40 páxinas (16.000 palabras) numeradas. Poderanse incluír fotografías, gráficos e ligazóns. Presentarase en calquera formato dixital editable.

Comprenderá as seguintes seccións:

- Portada (título, categoría de participación, código do centro, nome do centro, concello e provincia).
- Índice (paxinado).
- Distinción (descrición do valor que fai ao centro meritorio da concesión deste premio).
- Traxectoria e participación (traxectoria de participación no Plan Proxecta, coa indicación dos programas desenvolvidos, número de docentes -coordinadores e participantes- e alumnado -alumnos e alumnas- nos cursos en que se participase (2012/13, 2013/14, 2014/15, 2015/16 e 2016/17)).
- Descrición dos proxectos que se consideren máis salientables:
 - Enumeración dos proxectos.
 - Descrición de cada proxecto:
 - Contexto. Aquí expresarase a necesidade ou dificultade que motivou a posta en práctica do proxecto e o seu vínculo co contexto socioeducativo do alumnado.
 - Profesorado implicado. Identificación dos departamentos e descrición das funcións realizadas polo profesorado.
 - Aprendizaxe activa. Descrición das estratexias empregadas para favorecer a participación activa do alumnado. Se é o caso, incluíranse as medidas adoptadas co alumnado con necesidade específicas de apoio educativo.
 - Transcendencia. Implicación do resto da comunidade educativa: familias, Concello, ONG, asociacións, etc.
 - Produto final. Descrición e visibilización dos elementos elaborados no o proceso de aprendizaxe.
 - Avaliación. Valoración do logro acadado polo alumnado, polo profesorado e mais polo resto da comunidade educativa no desenvolvemento do proxecto. Indicarase tamén as perspectivas de mellora do proxecto de cara ao futuro.
 - Impacto. Visibilidade do proxecto, presenza pública a través dos medios de comunicación, nas redes sociais e publicacións, exposicións, etc.



- Valoración da práctica docente. Farase fincapé nas repercusións organizativas, pedagóxicas e programáticas da metodoloxía do traballo por proxectos.
- Liñas de mellora. Indicaranse os aspectos que o centro considera que se deben reforzar para darlles continuidade a estas metodoloxías. Ofrecerase unha reflexión sobre as circunstancias que favorecen ou dificultan o desenvolvemento destas estratexias de traballo; identificaranse os indicadores que se consideren máis axeitados para valorar os logros obtidos no centro a través desta metodoloxía.

Se é o caso, poderase presentar documentación física para achegar produtos que non sexan susceptibles de visibilizarse nunha plataforma dixital.

A solicitude débese presentar en calquera dos lugares e rexistros establecidos no artigo 16.4 da Lei 39/2015, do 1 de novembro, do procedemento administrativo común das administracións públicas.

A documentación remitirase preferentemente en formato dixital no prazo establecido nesta convocatoria ao correo electrónico: asesoria.innovacioneducativa@edu.xunta.es

Artigo 6. *Comisión de selección*

A comisión de selección estará formada por:

- Presidencia: subdirector xeral de Ordenación e Innovación Educativa e Formación do Profesorado, ou persoa en quen delegue.
- Vogais:
 - Xefa de servizo de Formación do Profesorado.
 - Tres persoas asesoras do servizo de Ordenación, Innovación e Orientación Educativa.
 - Unha persoa asesora do servizo de Formación do Profesorado, que actuará como secretario/a.

Esta comisión poderá contar co asesoramento das persoas responsables dos programas educativos con presenza nos proxectos descritos polos centros docentes participantes nestes premios.

Artigo 7. *Criterios de valoración*

A valoración realizarase unicamente a través da memoria presentada a esta convocatoria, e, de ser o caso, da documentación física. Valoraranse todos aqueles aspectos que describan accións concretas, metodoloxías aplicadas e logros acadados



coa participación nos distintos programas do Plan Proxecta. Non se valorarán aspectos retóricos, descrições baleiras e teorías pedagóxicas sen visibilización da súa aplicación na aula co alumnado.

Os criterios de valoración para a concesión dos premios serán:

1. Calidade da memoria presentada: presentación, calidade do contido, calidade lingüística e técnica (ate 10 puntos)
2. Visibilización do proceso de aprendizaxe no desenvolvemento dos proxectos (ate 10 puntos)
3. Nivel de implicación da comunidade educativa: profesorado, alumnado e outros colectivos (ate 10 puntos)
4. Nivel de logro acadado no desenvolvemento dos proxectos (ate 10 puntos)
5. Integración da metodoloxía por proxectos no centro (ate 20 puntos)
6. Calidade técnica e pedagóxica dos produtos finais (ate 10 puntos)
7. Non ter recibido premio Proxecta 2016 con dotación económica (ate 30 puntos)

Artigo 8. *Resolución*

A comisión de selección, unha vez avaliadas as solicitudes presentadas, emitirá unha resolución provisional dos premios concedidos. Esta resolución provisional poderá consultarse no portal educativo da Consellería de Cultura, Educación e Ordenación Universitaria, no seguinte enderezo electrónico: <http://www.edu.xunta.es>.

A partir do día seguinte ao da publicación da resolución provisional dos premios, abrírase un prazo de cinco días hábiles para que se poidan presentar as alegacións ou reclamacións que se consideren oportunas. Unha vez revisadas esas alegacións ou reclamacións, a comisión elevará a proposta definitiva de resolución dos premios concedidos ao director xeral de Educación, Formación Profesional e Innovación Educativa, para a súa aprobación. Esta resolución definitiva poderá consultarse no portal educativo da Consellería de Cultura, Educación e Ordenación Universitaria, no seguinte enderezo electrónico: <http://www.edu.xunta.es>.

O prazo para resolver as solicitudes correspondentes ás accións desta resolución será de tres meses, e comezará a contar desde o día seguinte á data de remate do prazo de presentación de solicitudes. Transcorrido este prazo sen que se dite resolución expresa, os/as interesados/as poderán entender desestimadas as súas solicitudes por silencio administrativo.

Contra esta resolución, que non esgota a vía administrativa, as persoas afectadas poderán interpor recurso de alzada perante o conselleiro de Cultura, Educación e Ordenación Universitaria no prazo dun mes contado a partir do día seguinte ao da publicación na web desta consellería, segundo o disposto nos artigos 121 e 122 da Lei



39/2015, do 1 de outubro, do procedemento administrativo común das administracións públicas.

Artigo 9. Certificación do profesorado

O profesorado implicado dos centros premiados nesta convocatoria recibirá unha certificación de premio de innovación educativa cunha equivalencia de 30 horas de formación permanente do profesorado para o docente coordinador e 20 para o profesorado participante.

Artigo 10. Pagamento dos premios

O pagamento do importe correspondente aos premios farase en base ao seguinte procedemento:

1. As contías asignadas por estes premios serán transferidas aos centros nun único pagamento, no período correspondente ao exercicio económico 2017.
2. importe concedido a cada centro premiado deberá destinarse a sufragar gastos que estean debidamente xustificadas e imputables á participación do centro no Plan Proxecta. Os gastos poderán corresponderse co pagamento de relatorios de persoas expertas, alleas ao centro educativo, que asesoren no desenvolvemento do proxecto, gastos de axuda de custo deses relatores, gastos de material fungible, gastos de adquisición de libros, etc. En ningún caso se utilizarán para a adquisición de materiais inventariables.
3. Os gastos teñen que realizarse na súa totalidade antes do 31 de decembro de 2017. A xustificación consistirá nunha certificación emitida na súa totalidade antes da mencionada data, emitida pola dirección do centro na que conste a relación de gastos, copias compulsadas das facturas e acreditación do seu pagamento. Dirixiranse á Dirección Xeral de Educación, Formación Profesional e Innovación Educativa, Subdirección Xeral de Ordenación e Innovación Educativa e Formación do Profesorado, Edificio administrativo de San Caetano, s/n, Bq. II – 2º andar 15781 Santiago de Compostela, ata o 31 de xaneiro de 2018.
4. A non entrega da xustificación do gasto no devandito prazo poderá ser causa de revogación das cantidades asignadas, debendo o centro proceder ao reintegro da cantidade percibida, sen prexuízo das responsabilidades que se lle poidan exixir.

Artigo 11. Difusión dos proxectos

A presentación a esta convocatoria implicará, no caso dos traballos premiados, a colaboración nas accións de difusión que se organicen, así como a cesión a favor da



Consellería de Cultura, Educación e Ordenación Universitaria dos dereitos de edición. Estes materiais difundiranse baixo a licenza “Creative Commons”, que combine as propiedades “recoñecemento” e “compartir igual”.

No caso de que os/as autores/as decidisen publicar os traballos premiados por outras vías, deberán solicitar o permiso correspondente á Dirección Xeral de Educación, Formación Profesional e Innovación Educativa. De ser a resposta positiva, na publicación deberá constar expresamente o premio concedido.

Os/as autores/as quedarán comprometidos a realizar as modificacións precisas nos documentos finais e/ou subministrar os ficheiros de código fonte necesarios para que poidan ser publicados total ou parcialmente no formato máis axeitado.

Artigo 12. *Datos de carácter persoal*

De conformidade coa Lei orgánica 15/1999, do 13 de decembro, de protección de datos de carácter persoal, os datos persoais recollidos na tramitación desta disposición, cuxo tratamento e publicación autoricen as persoas interesadas mediante a presentación das solicitudes, serán incluídos nun ficheiro denominado “Avaliación do sistema educativo” cuxo obxecto é xestionar este procedemento, así como para informar as persoas interesadas sobre o seu desenvolvemento. O órgano responsable deste ficheiro é a Secretaría Xeral Técnica da Consellería de Cultura, Educación e Ordenación Universitaria. Os dereitos de acceso, rectificación, cancelación e oposición poderanse exercer ante a Secretaría Xeral Técnica da Consellería, mediante o envío dunha comunicación ao seguinte enderezo: Secretaría Xeral Técnica da Consellería de Cultura, Educación e Ordenación Universitaria, Edificio administrativo de San Caetano, s/n, Bq. II – 2º andar 15781 Santiago de Compostela, ou a través dun correo electrónico a sxoifp@xunta.es.

Santiago de Compostela, 2 de febreiro de 2017



Manuel Corredoira López

Director xeral de Educación, Formación Profesional e Innovación Educativa